

車營叩答合編

督師拾遺百八叩說敘

會既與諸同志謀刊叩答合編工將竣適鹿拔萃學尊  
寓書相告曰嚮幸得讀百八答今於孫炳文茂才家又  
得文正公百八叩說一卷請續梓於叩答合編後釐爲  
四卷以成完璧會讀之喜不自勝以爲得未曾有也藉  
非文正天資學力超絕人寰誰能於叩答外更叅一解  
爰取叩答叅觀之深謀遠慮變化無窮雖以李衛公之  
問對弗是及也其亟梓而合訂之而文正當年之苦心  
想亦爲之一慰諸同志以會始終其事也復求弁語於  
簡端會竊恐言之未當於書中義蘊無所發明而復念

文正當日規畫榆關彷彿岳家軍之不可犯所以抒九重之憂慰萬民之望者豈淺鮮哉後之人管窺蠡測詎喻高深然會展讀再四欽佩難名竟有不能已於言者始見叩卽致疑於不能答旣見答更敬服答之已詳且盡而別無可說而公復有是說也必其於叩之中多所引伸也不然必其於答之外頓開異境也又不然必其於叩答旣成寓目愜心遂不禁言之不足而長言之也而要之公之爲是說也豈徒矜韜畧之淵博云爾哉誠以兵凶事也戰危機也一言之得失萬命之所係也臨時而說之恐洩機宜也先事而說之冀窺奧窔也久之

心傾神會觸類旁通且將以不說爲說矣公之說詳公  
之意深哉會於此竊有感焉時當晚季國祚將移冀入  
輔者有之願出鎮者誰乎諱言亂者有之敢談兵者誰  
乎而公竟以閣部而力請督師獨當一面日與鹿忠節  
諸公口講指畫制勝出奇復疆域數百餘里議者以公  
爲榆關之長城信不誣也孰意忽則將相忽則佚老致  
令讀其說者動以早謝兵權未酬夙志爲公惜而不知  
可惜者不在公也使其說行上之固可以安社稷下之  
亦可以庇人民卽其說不久行當時既可爲將佐式後  
世且不獨爲子孫法古云三不朽立言居一焉觀是說

也謂爲公之言也可謂爲公之德與功也亦奚不可迄  
於今公往矣而賢裔茂才猶與鹿拔萃均以英年雋秀  
振其家聲篤其世好而且善讀祖書交相勉爲有用之  
學是刻也旣賴其蒐羅以贊成之又資其校讐俾免魚  
魯藉非貽厥孫謀克昌厥後曷克臻此此會之所以不  
能已於言也至於拾遺之義則有拔萃之叙在

同治八年歲次己巳夏六月知任邱縣事武陟後學郭

會昌謹識

督師拾遺

古頊孫承宗著

定興鹿善繼校訂

車營百八四說

其一

周秦專用車乘衛青始用武剛車主自環爲營夫以營自環似徒爲守計者乃衛青所至有功知戰守原爲一事未有能守而不能戰者楊素不用車營之意恐將士知守而不知戰也而出奇於正用正爲奇奇正自有變化知此始可以用車

其二

古制七十五人先後於兵車一爲前拒一爲左角一爲右角戰則卒車相參夫車所以衛卒卒所以用車非車而卒無所依非卒而車無所用卒車相參古人前拒左右兩角盡之矣今以車戰酌其法而用之乃宜

其三

曹操始爲戰騎陷騎遊騎且云車徒常教以正騎隊常教以奇此平常花陣也臨陣或用正爲奇或用奇爲正常法原不必拘况騎隊常教以奇而又爲戰騎陷騎遊騎是明以戰騎奇而陷騎遊騎更奇中之奇已孟德亦

神於用兵者抑所言有未盡與

其四

馬隆言地廣則以鹿角車營狹則以木屋施於車且戰且前此得力於木屋也法當裹以皮革施以絮氈爲木屋起兩層近打遠攻矢砲可以及敵而敵不及我且又有遊兵夾車兩傍以掩以擊俾敵猝不及防我於是可戰而且可前

其五

劉裕伐南燕以車四千乘爲左右翼朱超石戰河上以車百乘抱河爲卻月營淮陰覆項兩翼以在前武侯走



繇兩翼以在後爲夾擊爲奇伏左右三疊古法盡之今以車用或張翼以分敵勢或抱河以禦敵冲或在前以擊其前驅或在後以防其後襲左擊右掩中軍列三層屹如山立此大勝之勢也諸大吏宜早有所思

其六

操以七十五人分守車以二十五人分攻車蓋百人而分爲四一分出攻三分入守更出迭入此攻彼守此守彼攻勞佚均而攻守各當今以二十五人三偏箱亦分爲四效其法而用之當合

其七

裴行儉詐爲糧車三百輛伏壯士十五輩誘突厥掠糧壯士出殺獲敵人幾盡此法甚捷今人皆膽怯而不敢行不知敵性貪鄙正可設計而誘之此亦料敵之術也爾將士抑何恐歟

其八

李靖討突厥越數千里營制不改有跳蕩奇兵有戰鋒隊步騎相半有駐隊兼車乘而出今之奇正盡之然跳蕩爲奇兵戰鋒爲戰兵駐隊爲助兵此奇正之常格也而易常爲變其用更神乎其神

其九

馬燧爲戰車行則以載止則爲陣其討田悅乃推火車焚悅將楊朝先柵破之今如以車焚柵宜乘晦冥風砂之際以輕車載火藥近柵順風疾走而投之火起乘亂急攻敵可因之而破

其十

戰車列營外以爲牆砲車置營中以爲骨弓車當陣門以爲屏今我專用火砲弓車似乎稍遜不知兵法短長相濟炮爲長兵刀矛爲短兵而已居長短之間此正無窮相接之意也以之當陣門魏勝之列陣蓋見於是云

其十一

車行寬坦道路數營齊發聲勢貴乎相聯或先或後或左或右猝然遇警左右相顧前後互援數營如此一營亦然調度明而營自無不立也法曰散者使之聚是言其味深長最宜潛玩

## 其十二

車行偏仄道路不能成列人自爲戰不能互援遇警猝難成營此必敗之勢也而轉敗爲勝或從別路揚塵熾火以憚其膽或於前路左牽右制以撤其軍用率然陣且戰且前勝則過險而行列可成否則收兵而退守自固然軍法有進無退當此警急彼驕我奮正出奇制勝

之時又何憚營陣之不可成

其十三

車行有敵來衝瀰漫甚衆或先驅老弱不相干者以費我矢石卻以精銳憑突宜用樓車發大砲以轟其後隊而前面堅守勿動撥奇兵分兩翼以抄其後俾令盡數遭我矢石以窮追逐勿遺

其十四

車行我縱直有餘而敵橫擊之張兩翼以抄我旁我橫擺有餘而敵直擊之伏兩翼以要我脇欲應而防之當撥遊兵分數起以擾其中軍其橫擊也我以前後兩軍

應之其直擊也我以左右兩軍應之而中軍指揮發縱出奇以防其變庶可無差

### 其十五

車行泥淖可陷人馬正在躊躇忽有敵來此敵乘我之危以肆其志也當亟整我軍堅陣以待俟敵氣竭卽乘其隙而擊之敵必敗退我於此勵兵秣馬過險得保無虞如更設疑陣以惑之愈妙

### 其十六

車行遇有大水又無舟楫方在整頓過渡敵或從旁突截我於此岸又乘我半渡敵或來前突截我於彼岸旣

渡則背水而陣半渡則抱河爲營臨時方法不過如是  
若預於兩岸探明確有要害可據或設疑陣以惑之或  
先伏兵以防之虛虛實實莫可測度俾敵畏顧不前方  
得制勝之訣

其十七

車行遇有叢林茂草伏火驟發我兵驚亂敵乃乘急來  
攻當先搜其伏火之處遇急則斬荆棘除草萊我卽移  
營上風以策以應而俟敵衝

其十八

車行遇有溜沙可陷人馬大風復作人力正困忽有伏

敵夫風沙之險彼我所同惟占風短長量沙遠近先時擬定可以抵備無虞臨時如有伏敵我則順風以應之既要以擊有何不可以防

其十九

車行遇有大木橫掛隘口或散置要路令我挪移不動敵卻突衝此當於大木所置之處晴則用火以燒之雨則囊砂以墊之約敵於何方衝突先扼其要而我軍如履坦途

其二十

車薄敵巢我從軍中出奇拔其外城而內城更堅欲悉



直營下口記  
衆力攻而內無車營爲護外之車營又無人爲守此當  
抽其四分之二半以守營半以巷戰而敵之所恃者弓  
矢我之所長者火砲卽推大砲於外城憑高以轟其內  
城乘亂用高麗牌夾以弓矢鎗炮聲東擊西連環而進  
內城雖堅必破計畧不出乎此

其二十一

車臨敵安營已定敵卻堅不來犯至十數日我兵不能  
久持法曰攻其所必救又曰攻其所不備敵自有所必  
救有所不備我設法以攻之敵欲不動而不能

其二十二

車未成陣敵驟來衝我一堵牆勢難萬全當預於擺陣之先探有要隘路口各設伏以據之則其陣立成又何敵之待退與

其二十三

車臨敵城敵堅守不出欲作長圍作偏攻我之矢砲不能仰攻敵之矢砲反能下及然敵長弓矢我利火炮用高麗牌爲陣以屈彼之長起土山架樓車駕滅虜虎蹲等炮以伸我之利敵必望而生畏夫豈止可以爲應可以爲防

其二十四

車臨敵地敵城守不動卻從旁從後有兵來犯我方整  
兵迎敵城中忽大譟出攻我當分四軍一軍迎來犯之  
敵小戰佯北誘之遠追以分其勢一軍迎出攻之敵麤  
戰不卻挫其銳氣以張我威兩軍守老營以策以應時  
出奇設伏以制之此兩應之策也宜相機而行

其二十五

車臨敵巢百計誘之不出我纔動敵卻尾我後我一回  
敵佯敗突有伏兵法曰逗亂而法不亂雖值倉卒紀律  
既明不至亂而不整況臨事而懼察其情揆其勢敵非  
甘於下人者吾能不早爲防備而受其詐哉是當有老

成持重之方制敵而不爲敵制

其二十六

車正行前方遇敵忽後數車脫陷不得卽行前後恐難  
兩應是當分中軍急援前軍而挫敵銳又分遊騎爲兩  
翼以繞護後軍揚塵熾火炫敵使之不前庶脫陷數車  
不至遇害前軍亦借其聲勢而可無虞

其二十七

車遇山險不得安行騎先恐不當敵之衝車先恐難爲  
我卽奏而伏敵乘機欲起應守兩難是當探有別道出  
奇設伏據險以要之伏敵必不能起而或騎或車無論

孰先皆安行無事已至別道之遠近險夷宜探確而後行毋悞

其二十八

車臨敵各爲固守而我有糧食之患此當先發因計就計聲言食乏設作回軍之勢敵必來攻而我車布置已定分剿合擊一鼓就擒必然之勢也况敵恃其飽而欺我之饑料彼必中吾之計而糧食之多寡更不待言

其二十九

車臨敵巢敵去城四五里爲壘以車騎居外以勇銳伏內使輕卒合戰佯走迫我兵薄城敵乃發伏俾我內外

前後受敵而又令別兵疾擊我后此當支一軍以牽城內之敵而合軍悉力以破其壘盡搜其勇銳以殺之而城內之敵必輸膽而不敢前矣彼別兵尚在遠處也何爲

其三十

車營初定或兵丁喧囂或火砲震動此內變也當申明連坐之法飭內巡風外巡風各官嚴查察訪又於變起之處自哨官以至火役察其性情稽其功過嚴飭而密防之自無鎮定之不如常

其三十一

戰車以衛輜車地方險仄止容戰車又恐輜車不能自守爲敵所邀然古人伏壯士於輜車敵掠糧壯士出而殺敵幾盡我固久欲師其智而未果於爲也今地險正得因時制宜以效其法又何患營不可立而斤斤於防固爲哉

其三十二

車先處戰地而待敵者逸後處戰地而趨敵者勞乃我先處戰地而逸而又慮敵之堅守以老我師也則迫敵邀敵誘敵激敵敵必出我可以待而能佚趨而不勞

其三十三

車臨敵地多下淫霖雨數至灌漑堪虞草穢叢生延燒  
爲慮地形不利不可久師也如敵先得地利我無別地  
可居卽當通溝渠除荆棘暫爲駐紮伺便拔營前進或  
移營暗襲出敵不意更奇

其三十四

車薄敵城敵乃左山右水重壘強弓退如山移進如風  
雨而糧食又多強敵在前我能長守乎法曰剛以柔克  
察其將帥之智愚部落之離合驕縱之離間之炫惑而  
疲玩之敵雖強未有不中我計者至是而可以擊之

其三十五



車以六營爲一股而一股之中有分合有照顧至臨陣擺設彼此應援相近則此營之砲易及於我相遠則此車之砲難及於敵而騎步出車又慮本營之搗虛其遠近虛實必有布置得宜者知此方可卻敵

其三十六

車臨水便可折轅爲橋爲船而人馬旣渡尙未合軍敵忽來犯或從上流以船筏截我夫軍未合而敵來犯勝負誠未可知也然敵從何來又從何犯先分軍以扼其要此必無虞若上流以船筏截我或沉鐵鎖或置鐵錐奇出不盡何難預爲之防

其三十七

車臨山阜不問山之前後左右有敵在數里之外據之  
我人馬動靜敵俱得而見欲移則無可移而又恐其乘  
我此宜乘烟霧或趁晦冥捲旗息鼓以過此山如或恐  
敵猝乘須留疑陣以禦之方可

其三十八

十二車營分爲兩股而一股又分幾路地遠則難合勢  
分則難應如欲分亦可以獨應合亦不至後時在預先  
探明道路之遠近酌量人馬之遲速計日而進渡岸必  
無不齊矣

其三十九

金蓋之間國初葉馬二將軍所由取遼東也車一登岸或先據各城以觀其變或卽薄敵以乘其危兵貴老成亦貴神速因敵制變不可拘泥

其四十

車營海蓋而耀州當中或議於此收遼人强者充兵佐助軍威於火器營領火器弱者延河開屯以充其餉强弱皆得所養安輯自不待言

其四十一

車營薄境有陷番諸領兵者跳身獨來或相率以歸或

領衆投順置之恐不得其力收之又難測其心此當察其性探其情投其好量才酌用考其績分別而獎勵之以此禮待庶其可盡兵機若分隸諸將反不得其力而生其心矣惟在我有術以籠絡駕馭之

其四十二

車營登岸遼人來歸其老弱家口當安插四衛以實其地以遼土養遼人卽以遼兵守遼土此大便利况四衛膏腴之地遼人之壯者可以充兵又何煩以船西渡乎是在辦善後者之好其爲也

其四十三

車營車遲騎速車路又道遠而不盡熟先車以抵敵勢  
孤而難戰後車而不至又不能盡車之利車與騎固當  
約期而至也而遠不得遲近不得速必以遼人爲嚮導  
無差

其四十四

車營抵海蓋當借遼人之食以食遼之新附者而敵糧  
多在開鐵其海蓋或少因糧之計卽以新附遼人舊與  
敵通貿易者設法購運俾敵得獲利而遂其食糧自取  
之不盡用之不竭

其四十五

車一股分六營其分而相應合而相聯惟大將能令之而勢相懸隔敵在呼吸之間我用口號一呼卽至如臂使指又何難立得分合立得應援

其四十六

車營馬步戰輜相爲比合而兩將分統步騎其比而能親合而能應應步而步應騎而騎一呼立應捷於影響有營將所見所不見者蓋號令素明而士卒知以性命相倚故臨時不相推諉以致死爲已責云

其四十七

車行東北而錦義有伏敵或西虜邀我輜重車近覺島

而彼岸有敵舟如納哈之從長廣反攻者我預於錦義  
覺島等處撥遊兵扼要以據而整軍前進堂堂正正萬  
無一虞

其四十八

車入敵境敵忽傾巢奔回舊寨我兵入據而內卻無糧  
敵乃復出以攻以圍然孤軍懸入敵棄城而卽據之此  
非探知虛實布置嚴密使敵不得攻圍者必不可以出  
此

其四十九

車臨敵境徒得空城而敵遁山險叢箐中我軍旣難深

入我糧不能久支稍議還兵而敵復據城我去而敵仍  
遁此當於敵舊巢四面陰使短髮遼人周厯山險探有  
要害或據險以擋其來或潛師以搗其穴更番迭戍復  
屯田通商作長久之計城雖空而可實也師有進而無  
退豈可議還

其五十

車旣攻而殺敵餘孽尙存勢當殄滅而大兵據城去蓋  
旣遠糧恐難運兵恐乏食當趕緊排撥催運或由津以  
舟運而至或由關以駝運而前而京東屯積口外權酌  
等項俱可移撥充餉而我軍安堵無虞



其五十一

車旣臨敵人可因兵地可因糧而奪遼人之糧遼且爲  
亂以抗王師卽未敢抗而遼糧旣盡遼亦無食此必然  
之勢也然我於延關開屯歲徵數百萬而鹽茶牛馬參  
茸金錫材木皮革皆遼東土產種種計算遼自可以爲  
生特恐司會不早爲計也何患焉

其五十二

車營下定中有奸細當兩相交鋒之際忽有變動守兵  
忙亂戰兵驚慌卽查變動之處自某隊起自某隊止由  
下而上罪專在官由上而下罪責在士如獲奸細卽治

以極法以昭鎮定戰守俱各如常

其五十三

車臨敵譏暗襲敵營而地有險易道有遠近兵有馬步將有鈍敏且古人刳寨之馬必選迅快不鳴嘶者然或險易或遠近或馬步或鈍敏俱可因時制宜量才而用法曰知已知彼百戰百勝馬可銜枚疾走而夜襲以迅快不鳴者爲良

其五十四

車營既定敵於晝日不動卻於黑夜刳營或由別路以擊我後而敵不數十人使我全營不得休息靜待之又

恐敵多猝至此責專在外巡或先於我營四面有通敵  
道者設伏弩鈴狗拒馬梅井火池等具敵雖至難施其  
術矣我於此反可因其計而出奇兵

其五十五

車分幾路敵祇專攻一路我各路未集其一路立定手  
腳便可鼓舞大眾少有差錯衆心卽以駭懼爲大將者  
毋邀功毋恃才毋輸膽毋長敵量而後進否則堅壁以  
俟援軍

其五十六

車臨敵尙未交鋒忽報西北有西虜助敵勢甚凶惡此

當以前軍應敵以後軍應虜以中軍策應前後而又別  
出奇兵或分兩翼以助軍威或伏數堆以挫敵銳俾得  
兩設互敵自然出以從容

其五十七

車營下定忽遼人之爲敵兵者來投或西虜報來助順  
我方翹望爲快而原是敵兵到卽爲亂夫西虜狡黠未  
敢遽以爲助智者知而防之矣而遼人之爲敵兵者來  
投其徒手以來乎抑持兵以來乎此易於覺察也而防  
範自有其方

其五十八

車營各路抵境敵方隨路擺設於彼岸欲渡則難登相持則難待當分遊兵二千從上流潛渡以搗其老巢或合數軍以攻其一處使其顧此失彼不知所從彼必不暇於擺設而彼岸可登持虛攻虛策當出此

其五十九

車營一處交鋒而敵效我別路之衣帽以淆我於蒼茫之際使我不分主客甚有我居主地敵居客地而誤認如宋之西兵者然我軍衣帽旗幟各有暗記因時而變隨地而遷此又辨之易辨也而策應何難

其六十

車一渡必據海蓋爲要然敵棄金復而於海蓋尙有兵也倘一聞我兵之東而加兵於海蓋我以蓋套等地爲捷徑而近才十餘里遠才四五十里一渡河則后背水而前臨堅城勁敵夫金復海蓋四衛俱沿海北岸犬牙相錯形勢固一脈也敵旣棄金復而加兵於海蓋何爲乎我復以津軍抄其旁而襲其後令彼前後受敵敵必惶怯而我可以出奇

其六十一

車臨敵地必資水草敵或賡料經行之地置有毒物又或以投順之民簞食壺漿及獻糧草者我以爲順民而

卻有毒害之法此固易辨也執其人物而試之便知

其六十二

大兵臨敵其短髮遼人向我者當辨別不嗜殺戮以收其心背者當收拾以使順從而借其力然果何以辨別乎亦試其誠耳又何以收拾乎祇誘以利耳我所以駕馭遼人者以此

其六十三

車臨蓋州則金復在我之後東江之於金州登鎮之於復州當互爲聲勢平島之于鮮人當相率而入然地相遠必使二鎮虛而能寔用遼人之新附者統以遼將聯

絡而移借之而東江登鎮平島鮮人皆成犄角之勢二  
州乃寔而不虛

其六十四

車外之奇兵仍爲車也又有奇外之奇使其駭如天降  
第西虜之幕不易驀越開鐵之西北未有通途而欲得  
其民以相助必設法結其豪俠曉以忠義動以利名久  
之其人必與西虜忤而我則分軍陽爲之彈壓至卽與  
豪俠約內外相攻而責以背盟之義申以和好之情西  
虜必束手無策斯可謂奇外之奇

其六十五



法曰奔則伏兵發戰則衆心散圍敵之道果不以堅守爲事乎然敵性貪汚不大創之則不潰倘使逸去遼土何以久安乎伏精兵以待其奔而擊之不若置遊兵俟其奔而殲之之爲快也然必視敵之大小爲之總勿令其逸去

### 其六十六

車方對敵無故自開一角疑欲奔出我方併力合備於此而敵卻從我之疎處以奔抑又何難先覺也晴晝則視其塵起於何方黑夜則聽其聲聚於何處况敵有必奔之地有不必奔之地豈見其開一角而他處遂可以

疎而不防

其六十七

車方深入敵境寂然不見一人此當秣馬勵兵坐視以觀其變敵忽出奇合攻一營此必以相近之營助之又或未敗而退此輕兵來誘斷不可逐而况拔營而前乎是當爲持重之謀敵計不磨自銷

其六十八

車行平坦則分五方而迎中軍矣如遇山川險狹必當另有分布法曰歛左右二軍而前後如故夫左右之歛隨地爲之固甚便倘盡置之後恐不利於前而左爲前

之後右爲後之前定爲常法臨時自不令而行

其六十九

車入敵境地形順逆叢林厚薄我人未必盡悉也而衆車分行又各有險易法曰利則進不利則止夫兵行進止豈可不齊乎遼人吾人也遼貨吾貨也法曰爲深入之道人則殺貨則掠此亦可殺而掠之乎蓋所謂不利則止者謂止於其道而出別路以進也所謂殺掠者謂深入敵境非我今之遼東也然殺掠亦嚇敵之術宜分別以爲

其七十

敵情於未合而當審之也夫不能知敵之情而浪與戰者敗知而避之不可戰又不可必謹持而應之方能爲勝法曰知己知彼百戰百勝是言當味之

其七十一

車所駐之地環衛無虛地也敵攻一面則引中權權勇以赴之他面不可減動法曰慮敵擊其虛而率精兵襲吾減損之地也乃敵愈益兵而我不加兵勢當分兩翼以出奇兵或抄其旁或襲其後或搗其老巢因敵製變法不可拘

其七十二

車臨敵忽有敵中叛將蜜持約要言在某處爲內應或某日來投或言敵中消息及應我之計其真也僞也俱在所不論當審某處之情形何如敵中之布置何如應我之計其得失可否又何如臨時整軍而出先撥一軍以試之孚其言大軍卽如約而赴否則暫爲回兵無中於其間乃奇

其七十三

車臨敵忽有自敵中跳身來歸者備言敵情如何備我又言我當如何制敵信之則恐爲間不信又恐失機是當優禮以待之而察其言觀其色伺其動靜復期以事

而探其心醉以酒而察其隱有過暫恕之有功卽賞之更假爲敵之來投者面許爲奸法當置以死而我偏愛其才亟請於朝而赦之至是無論其非間也卽間亦爲我用

### 其七十四

法死而用法活是所謂酌乎古而準乎今也如法所用諸奇專在騎步今以車用似乎有礙不知我固有輕箱攢槍等車專爲出奇而設如用諸奇卽選精騎以駕之而參以馬步則車又不可少也彼此相借又何照顧之有歟

其七十五

兵之所居利生地而惡死地而士卒顧家卽生地亦死地也今舉世怕進取我矯取置之死地而能生非素練之師不能有此決斷也其要專在練心而練耳目練手足練技藝練陣勢夫固爲行軍之餘

其七十六

車偏險地而天地震晦風雨交集山川不辨當堅定敵來勿戰俟天稍霽觀敵強弱而進退之然倉猝之際堅行陣嚴號令必先據隘口或橫大木荆棘以塞之或設陷坑暗索以執之敵必不來來則多設探報半里一堆

一里兩鋪傳呼立至雖震驚蕩塞可備不虞

其七十七

車與敵遇而所駐之地迴渠迂澗深峽隘口草木叢密  
高下相乘車雖不便而因地制宜在我之善於用也或  
駕回渠以剿敵或延迂澗以守營或引敵深峽而痛剿  
或伏兵隘口而據險而高高下下復於草木叢密之中  
多設旗幟鳴金擂鼓威震山川此大盛之勢也危而可  
以安

其七十八

師行逐北平廣則以騎山水則以步遠用炮而近用矢



宜矣至有騎出追而步割級乃不慮營之虛乎是當戰守各半不多不少出以從容

其七十九

車之列營結陣觀旗幟之動審金鼓之音動有變靜有方隨五行爲運轉是古人所稱天將者若以變用正以神用奇通而透之則又不拘於常也惟在因天因地因敵而偶一用之不可預計

其八十

兵有時順地而逆用之逆地而順用之又能不擇險易安而後動卽蹈死地而能生卽至亡地而能存斯固無

不可用之地特賢智之將不得已而然也法曰地形不利不可久居究以是言爲正

其八十一

車之佈置強者不得先弱者不得後所以均勞佚而齊衆力也乃有強將無天時無地利任其人無有勇怯聞敵而卽行又有猛將兵無多少敵無強弱三軍順令如背使指單劍催鋒先入使敵失措而遠遁以二將拘於車必窘其才而無用是當選梟雄有氣畧者二千人騎步各半俾得自成一軍以之當陣而冲鋒二將必不負我所任

其八十二

議者謂車能拒人而不能致人然車營成較向之不能拒人者其得失何如也况拒之卽所以致之如車中之騎步出奇設伏或後擊或旁抄或掩襲引敵及車而矢砲及之敵退則復引之車豈祇拒人而不致人

其八十三

車營照管定數似難摘用而李淵選善騎射者二千飲食舍止如突厥與之遇伺便擊之無不捷我效其法而用之於十分中摘其一分卽傾以強猛之將乃奇

其八十四

車一營騎步每虞不相爲用乃令六營各分立爲定制使彼此有不得不聯之勢功則輕重各賞過則分別受罰毋分畛域互爲應援一營之聯絡專在十二材官六營之比聯專在各路哨探

其八十五

車步狹隘之地及過險出隘難以今所定營行也古有約隊之法今以用於車而前後左右中五部魚貫而進綿綿翼翼殆一直陣焉

其八十六

方圓曲直銳每陣五變而得二十五或以爲花陣也臨

陣無所用然一營固可以爲五行矣約之而衝而衡而乘莫不可以爲五行也悟其理者惟相邱陵林壑平陸斥澤之不同高下險易生死支掛之各異而因以制騎步多寡疎密輕重分合之所宜

其八十七

車之制要便利爽快矣而車營之制亦要簡易直捷今驅車策馬法似煩亂然練熟自易况臨時傳令有材官稽查有監督而內巡風巡內外巡風巡外有變則彌縫補缺專在中權營制又豈不簡易直捷

其八十八

矢可以及百步砲可以及數里遠近如是高下畧同魏  
爲霹靂車而袁紹之樓櫓皆破我師其智而爲之夫豈  
不可以仰攻况彼可因高爲營我能爲高而擊是不必  
虞

其八十九

敵三面各有重城以居我叛將及遼人之爲生計者而  
敵之親兵俱在城內其西一面臨代子河不住一人城  
中水乏開小便門取水於河當設計招我叛將誘我遼  
人視其何處有隙可乘卽以何處爲先着而留兵於餘  
面以防其劫否則囊砂以截上流而更置毒於河敵亦

不擊自憊也

其九十

車抵海蓋便當乘勝薄敵而大軍未集恐蹈吳漢克廣  
抵城之弊當量敵之多寡強弱虛實離合智愚而慎重  
以出乃合

其九十一

行兵必先審敵之虛實而趨乘其危然欲乘敵者尤必  
防敵之乘我我如時值倉猝軍營一切備具約束偶有  
未齊宜先發遊兵擾敵前後使其不敢遽來方可以從  
容擺設而趨乘其危

其九十二

天久陰雨車陷馬止四面受敵當堅陣固壘秣馬勵兵  
俟天變稍息選輕快車馬俾猛將出奇以擊之擊退勿  
論獨逐衆逐不必窮追若占天而得時爲燥採盤而得  
地爲高此深入之利也當預於六館謀之

其九十三

車行無犯進止之節無失飲食之時無絕人馬之力進  
不可當退不可遏左右而麾前後有節絕成陣散成行  
要在合而不離用而不疲與之安與之危而已而非練  
其心練其耳目樂賞畏罰視主帥如心腹者不能



其九十四

凡戰非陣之難使人各能布陣爲難又非知之難行之難今之諸將尙有不知者當頒發車營練陣規條使平時熟讀之而三日小操五日合演十日會哨二十日大閱熟練者加賞否則罰再閱不符者黜此陣之常式也而變而通之又任諸將之智慧予是有厚望焉

其九十五

車行馬羸牛駝號爲五萬其秣飼當因於地而敵似習藉地之法如元昊所以誘契丹王君媿所以破突厥者我當先站一着募短髮遼人敢爲死士者繞出敵後凡

敵所必經必據之地通行此法使敵無所恃敵或貪此地之秣飼而不遽趨也此策以不防爲防

其九十六

凡設伏暗劫詐誘皆權勇所爲而將惟智士乃愚今使士知其用而將反不知何以乘機此參僚之不可不設也向時開原一路之兵敵實假我旣潰之兵而詐迎爲計也我軍衣裝旣各有暗記自不至爲敵所誤而所以振作將士者下等在賞罰必當上等在奮其忠義之心

其九十七

選練乘亂之精卒必揀士之裊雄者騎二百人步三百

人加其糧賞時申訓練以有智畧之偏裨領之借扞武種種火器駭亂敵軍而一鼓作氣必可以冲鋒破壘殺獲無窮

其九十八

敵少則宜使之聚敵多則宜使之散敵三面據城一面據河俱有精兵防守無懈可擊然敵性貪或委金帛以相誘敵情狡或行詐僞以相欺我復聲其東而擊其西虛實莫測使敵不知所向敵必破散無疑

其九十九

軍營自有奇正然止供一營之用卽策應他營亦如一

營也今大兵自西來南與東卻有奇兵如所稱用寡用奇裹毡踰嶺當不在車營而東西兩鎮不足恃此必別有奇男子曉暢邊事洞悉敵情沉雄果毅可任大事者而中朝恐未之間也可惜

其一百

車行必擇晴乾而用奇必因風霧雨雪蘇定方乘霧雪兩破突厥楚備吳雨十日楚乘吳之還而擊之吳乃破今如用奇選迎鋒鑕鎗等輕快便利之車或因風霧或乘雨雪出敵不意而疾擊之而掩襲之敵必敗惟料敵明白乃能

其百一

攻有三道曰正曰奇曰伏昔李愬自文城疾馳而蔡滅  
鄧艾自陰平踰嶺而蜀降此一奇勝一伏勝也今奇伏  
而用於車平曠之地無論已如遇山川險阻當環車營  
於要隘而奇伏始可以行

其百二

車深入而敵堅壁不戰法曰攻其所不備又曰攻其所  
必救而敵止一塞其備甚具無糧草可斷無歸路可截  
計必偏攻夫偏攻是必諒其所必救料其所不備矣要  
在用詐用誘而斟酌乎虛實之間

其百三

其舊遼城之形勝我哨探未必深到也然短髮遼人從敵已久必有知而習之者卽廟山口于耀州一帶可令探明而好爲之應

其百四

兎酋平時稱順似乎可用虎酋近日爲恭亦無或虞然抽歹固敵中之桀驁也抄宰又敵外之比鄰也計當以敵禦敵籠牢兎虎二酋使其牽制抽歹抄宰不致蠢動而我復留一營合耀州新設遼營聯絡其勢以禦之夫而后悉力進攻以盡車之利

其百五

津運僅供十萬而遼人來歸西虜隨後需糧更多其食俱在所携之外預爲計者當咨部以增其餉而權酤之稅屯積所充以及糧草之可因於敵者暫爲接濟卽核實酌定餉需月支分數挨次趕緊請發

其百六

車營一戰一守動靜各半不空方以行故一營之馬步砲矢无一人一器不更番叠陣其守營也此出則彼守此守則彼出其出戰也騎奇則步正騎正則步奇其用器也步隊則鳥鎗卽機前而三眼火箭在後騎隊則弓

箭三眼大砲連環疊用而權勇八百分四正四奇四正  
隨四督以內衛主將分應四衝四奇隨四督以外監騎  
步督察四衝而旗鼓餘奇隸中軍曰握奇以備補伍更  
有奇外之奇或用樓車架大砲以轟其後或選精銳俾  
猛將以挫其鋒此調度之大畧也

其百七

車之全得力在後勁而車一營之得力在中權陣始於  
方員此卷而藏之也而後勁在中繼以曲直銳此舒而  
張之也而發勁在後此一營之後勁也當分別用之

其百八



車營深入千里營有大小戰非一合砲擊退敵騎步追殺敵乃佯敗或旣敗而糾衆來援無論其速與緩也營之近敵者則擊之遠敵者則抄之或在敵前則列陣以擊其前或在敵後則進兵以擊其後或在敵左右則夾擊以掩其左右紛紛紆紆逗亂而法不亂旣勝則鳴金收隊各歸各營以行犒賞

明高陽孫文正公傳

孫承宗字稚繩高陽人貌奇偉鬚髯戟張與人言聲殷  
牆壁始爲縣學生授經邊郡往來飛狐拒馬間直走白  
登又從紇干清波故道南下喜從材官老兵究問險要  
阨塞用是曉暢邊事萬歷三十二年登進士第二人授  
編修進中允挺擊變起大學士吳道南以諮承宗對曰  
事關東宮不可不問事連貴妃不可深問龐保劉成而  
下不可不問也龐保劉成而上不可深問也道南如其  
言具揭上之事遂定出典應天鄉試發策著其語摺黨  
人忌將以大計出諸外學士劉一燝保持乃得免歷諭

德洗馬熹宗卽位以左庶子充日講官帝每聽承宗講輒曰心開故眷注特殷天啟元年進少詹事時潘遼相繼失舉朝洶洶御史方震孺請罷兵部尙書崔景榮以承宗代廷臣亦皆以承宗知兵遂推爲兵部添設侍郎主東事帝不欲承宗離講筵疏再上不許二年擢禮部右侍郎協理詹事府未幾

大清兵逼廣寧王化貞棄城走熊廷弼與俱入關兵部尙書張鶴鳴懼罪出行邊帝亦急東事遂拜承宗兵部尙書兼東閣大學士入直辦事越數日命以閣臣掌部務承宗上疏曰邇年兵多不練餉多不覈以將用兵而以

文官招練以將臨陣而以文官指發以武畧備邊而日增置文官於幕以邊任經撫而日問戰守於朝此極弊也今天下當重將權擇一沉雄有氣畧者授之節鉞得自辟置偏裨以下勿使文吏用小見沾沾陵其上邊疆小勝小敗皆不足問要使守關無闌入而徐爲恢復計因列上撫西部恤遼民簡京軍增永平大師修薊鎮亭障開京東屯田數策帝褒納焉時邊警屢告閣部大臣幸旦暮無事而言路日益紛呶承宗乃請下廷弼於理與化貞並讞用正朝士黨護又請逮給事中明時舉御史李達以懲四川之招兵致寇者又請詰責遼東巡按

方震孺登萊監軍梁之垣薊州兵備邵可立以警在位之馘馘者諸人以次獲譴朝右聳然而側目怨咨者亦衆矣兵部尙書王在晉代廷弼經畧遼東與總督王象乾深相倚結象乾在薊門久習知西部種類情性西部亦愛戴之然實無他才惟啖以財物相羈縻冀得以老解職而已在晉謀用西部薺廣寧象乾基之曰得廣寧不能守也獲罪滋大不如重關設險衛山海以衛京師在晉乃請於山海關外八里鋪築重關用四萬人守之其僚佐袁崇煥沈槩孫元化等力爭不能得奏記於首輔葉向高向高曰是未可臆度也承宗請身往決之帝

大喜加太子太保賜蟒玉銀幣抵關詰在晉曰新城成  
卽移舊城四萬人以守乎在晉曰否當更設兵曰如此  
則八里內守兵八萬矣一片石西北不當設兵乎且築  
關在八里內新城背卽舊城趾舊城之品坑地雷爲敵  
人設扣爲新兵設乎新城可守安用舊城如不可守則  
四萬新兵倒戈舊城下將開關延入乎抑閉關以委敵  
乎曰關外有三道關可入也曰若此則敵至而兵逃如  
故也安用重關曰將建三寨於山以待潰卒曰兵未潰  
而築寨以待之是教之潰也且潰兵可入敵亦可尾之  
入今不爲恢復計畫關而守將盡撤藩籬日閱堂奧幾

東其有寧宇乎在晉無以難承宗乃議守關外監軍閭  
鳴泰王覺華島袁崇煥主寧遠衛在晉持不可主守中  
前所舊監司邢慎言張應吾逃在關皆附和之初化貞  
等既逃自寧遠以西五城七十二堡悉爲哈喇慎諸部  
所據聲言助守邊前哨遊擊左輔名駐中前實不出八  
里舖承宗知諸部不足信而寧遠覺華之可守已決計  
將自在晉發之推心告語凡七晝夜終不應還朝言敵  
未抵鎮武而我自燒寧前此前日經撫罪也我棄寧前  
敵終不至而我不敢出關一步此今日將吏罪也將吏  
匿關內無能轉其畏敵之心以畏法化其謀利之智以

謀敵此臣與經臣罪也與其以百萬金錢浪擲於無用之版築曷若築寧遠要害以守八里舖之四萬人當寧遠衝與覺華相犄角敵窺城令島上卒旁出三分斷浮橋繞其後而橫擊之卽無事亦且收二百里疆土總之敵人之帳幕必不可近關門杏山之難民必不可置膜外不盡破庸人之論遼事不可爲也其他制置軍事又十餘疏帝嘉納無何御講筵承宗面奏在晉不足任乃改南京兵部尙書并斥逃臣慎言等而八里築城之議遂熄在晉旣去承宗自請督師詔給關防敕書以原官督山海關及薊遼天津登萊諸處軍務便宜行事不從



中制而以鳴泰爲遼東巡撫承宗乃辟職方主事鹿善繼王則古爲贊畫請帑金八十萬以行帝特御門臨遣賜尙方劍坐蟒閣臣送之崇文門外旣至關令總兵江應詔定軍制僉事崇煥建營舍廢將李秉誠練火器贊畫善繼則古治軍儲沈聚杜應芳繕甲仗司務孫元化築礮臺中書舍人宋獻羽林經歷程崙主市馬廣寧道僉事萬有孚主採木而令遊擊祖大壽佐金冠於覺華副將陳諫助趙率教於前屯遊擊魯之甲拯難民副將李承先練騎卒叅將楊應乾募遼人爲軍是時關上兵名七萬顧無紀律冒餉多承宗大閱汰逃將數百人遣

遼河南真定疲兵萬餘以之甲所救難民七千發前屯  
爲兵應乾所募遼卒出戍寧遠咨朝鮮使助聲援犒毛  
文龍於東江令復四衛檄登師沈有容進據廣鹿島欲  
以春防躬詣登萊商進取而中朝意方急遼弗許也應  
詔被劾承宗請用馬世龍代之以尤世祿王世欽爲南  
北師聽世龍節制且爲世龍請尙方劍帝皆可之世龍  
旣受事承宗爲築壇拜行受鉞禮率教已守前屯盡驅  
哈喇慎諸部撫場猶在八里舖象乾議開水關撫之關  
內承宗不可乃定於高臺堡時

大清兵委廣寧去遼遺民入居之插漢部以告有孚有孚

謀挾西部乘間殲之宵恢復功承宗下檄曰西部殺我  
人者致罰如盟言是役也全活千餘人帝好察邊情時  
令東廠遣人詣關門具事狀奏報名曰較事及魏忠賢  
竊政遣其黨劉朝胡良輔紀用等四十五人齎內庫神  
礮甲仗弓矢之屬數萬至關門爲軍中用又以白金十  
萬蟒麒麟獅子虎豹諸幣頒賚將士而賜承宗蟒服白  
金慰勞之實覘軍也承宗方出關巡寧遠中路聞之立  
疏言中使觀兵自古有戒帝溫旨報之使者至具杯茗  
而已鳴秦之爲巡撫也承宗薦之後知其無實軍事多  
不與議鳴秦快快求去承宗亦引疾言官共留承宗詆

鳴泰巡關御史潘雲翼復論劾之帝乃罷鳴泰而以張  
鳳翼代鳳翼怯復主守關議承宗不悅乃復出關巡視  
抵寧遠集將吏議所守衆多如鳳翼指獨世龍請守中  
後所而崇煥善繼及副將茅元儀力請守寧遠承宗然  
之議乃定令大壽興工崇煥滿桂守之先是虎部竊出  
盜掠率教捕斬四人象乾欲斬率教謝虎部承宗不可  
而承宗所遣王楬戊申右護其兵出探木爲西部朗素  
所殺承宗怒遣世龍勦之象乾恐壞撫局令朗素縛逃  
人爲殺楬者以獻而增市賞千金承宗方疏爭而象乾  
以憂去承宗患主款者撓已權言督師總督可勿兼設

請罷已不可則弗推總督并請以遼撫移駐寧遠帝命  
止總督推而鳳翼謂置已死地也因大恨與其鄉人雲  
翼有孚等力毀世龍以撼承宗無何有孚爲薊撫岳和  
聲所劾益疑世龍與崇煥構陷乃共爲浮言撓出關計  
給事中解學龍遂極論世龍罪承宗憤抗疏陳守禦策  
言拒敵門庭之中與拒諸門庭外勢旣辨我促敵二百  
里外敵促我二百里中勢又辨蓋廣寧我遠而敵近寧  
遠我近而敵遠我不進逼敵敵將進而逼我今日卽不  
能恢遼左而寧遠覺華終不可棄請敕廷臣雜議主客  
之兵可否久戍本折之餉可否久輸關外之土地人民

可否捐棄屯築戰守可否興舉再察敵人情情形果否坐  
待可以消滅臣不敢爲百年久計祇計及五年間究竟  
何如倘臣言不當立斥臣以定大計無紆迴不決使全  
軀保妻子之臣附合衆喙以殺臣一身而悞天下也復  
爲世龍辯而發有孚等交搆狀有孚者故侍郎世德子  
也爲廣寧理餉同知城陷逃歸象乾題爲廣寧道僉事  
專撫播漢乾沒多至是以承宗言被斥鳳翼亦以憂歸  
喻安性代而廷臣言總督不可裁命吳用先督薊遼代  
象乾承宗惡本兵趙彥多中制稱疾求罷舉彥自代以  
困之廷議不可而止時寧遠城工竣關外守具畢備承

宗圖大舉奏言前哨已置連山大凌河速界臣餉二十  
四萬則功可立奏帝命所司給之兵工二部相與謀曰  
餉足渠卽妄爲不如許而不與文移往復稽緩之承宗  
再疏促具以情告帝爲飭諸曹而師竟不果出初方震  
孺游士任李達明時舉之譴承宗實劾之後皆爲求宥  
復稱楊鎬熊廷弼王化貞之勞請免死遣戍朝端謹然  
給事中顧其仁許譽卿御史袁化中交章論駁帝皆置  
弗省會承宗叙五防效勞諸臣且引疾乞罷乃遣中官  
劉應坤等齎帑金十萬犒將士而賜承宗坐蟒膝襪佐  
以金幣當是時忠賢益盜柄以承宗功高欲親附之令

應坤等申意承宗不與交一言忠賢由是大憾會忠賢  
逐楊漣趙南星高攀龍等承宗方西巡薊昌念抗疏帝  
未必親覽往在講筵每奏對輒有入乃請以賀聖壽入  
朝面奏機宜欲因是論其罪魏廣微聞之奔告忠賢承  
宗擁兵數萬將清君側兵部侍郎李邦華爲內主公立  
齋粉矣忠賢悸甚繞御牀哭帝亦爲心動令內閣擬旨  
次輔顧秉謙奮筆曰無旨離信地非祖宗法違者不宥  
夜啟禁門召兵部尙書入令三道飛騎止之又矯旨諭  
九門守閤承宗若至齊化門反接以入承宗抵通州聞  
命而返忠賢遣人偵之一襍被置輿中後車鹿善繼而



已意少解而其黨李蕃崔呈秀徐大化連疏詆之至比之王敦李懷光承宗乃杜門求罷五年四月給事中郭興治請令廷臣議去留論冒餉者復踵至遂下廷臣雜議吏部尙書崔景榮持之乃下詔勉留而以簡將汰兵清餉三事責承宗奏報承宗方遣諸將分戍錦州大小凌河松杏右屯諸要害拓地復二百里罷大將世欽世祿副將李秉誠孫諫汰軍萬七千餘人省度支六十八萬而言官論世龍不已至九月遂有柳河之敗死者四百餘人語詳世龍傳於是臺省劾世龍并及承宗章疏數十上承宗求去益力十月始得請先已屢加左柱國

少師太子太師中極殿大學士遂加特進光祿大夫廕  
子中書舍人賜蟒服銀幣行人護歸而以兵部尙書高  
第代爲經畧無何安性亦罷遂廢巡撫不設初第力扼  
承宗請撤關外以守關內承宗駁之第深憾明年寧遠  
被圍乃疏言關門兵止存五萬言者益以爲承宗罪承  
宗告戶部曰第初在關嘗給十一萬七千人餉今但給  
五萬人餉足矣第果以妄言引罪後忠賢遣其黨梁夢  
環巡關欲傳致承宗罪無所得而止承宗在關四年前  
後修復大城九堡四十五練兵十一萬立車營十二水  
營五火營二前鋒後勁營八造甲冑器械弓矢礮石渠

答鹵楯之具合數百萬拓地四百里開屯五千頃步人十五萬後叙寧遠功廕子錦衣世千戶莊烈帝卽位在晉入爲兵部尙書恨承宗不置極論世龍及元儀熒惑樞輔壞關事又嗾臺省交口詆承宗以沮其出二年十月

大清兵入大安口取遵化將薄都城廷臣爭請召承宗詔以原官兼兵部尙書守通州仍入朝陛見承宗至召對平臺帝慰勞畢問方畧承宗奏臣聞袁崇煥駐薊州滿桂駐順義侯世祿駐三河此爲得策又聞尤世威回昌平世祿駐通州似未合宜帝問卿欲守三河何意對曰

守三河可以沮西奔遏南下帝稱善曰若何爲朕保護  
京師承宗言當緩急之際守陣人苦饑寒非萬全策請  
整器械厚犒勞以固人心所條畫俱稱旨帝曰卿不須  
往通其爲朕總督京城內外守禦事務仍參帷幄趣首  
輔韓爌草敕下所司鑄關防承宗出漏下二十刻矣卽  
周閱都城五鼓而畢復出閱重城明日夜半忽傳旨守  
通州時烽火逼近郊承宗從二十七騎出東便門道亡  
其二疾馳抵通門者幾不納旣入城與保定巡撫解經  
傳御史方大任總兵楊國棟登陣固守而

大清兵已薄都城乃急遣遊擊尤岱以騎卒三千赴援旋

遣副將劉國柱督軍二千與岱合而發密雲兵三千營東直門保定兵五千營廣寧門以其間遣將復馬蘭三屯二城至十二月四日而有祖大壽之變大壽遼東前鋒總兵官也偕崇煥入衛見崇煥下吏懼誅遂與副將何可綱等率所部萬五千人東潰遠近大震承宗聞急遣都司賈登科齎手書慰諭大壽而令遊擊石柱國馳撫諸軍大壽見登科言麾下卒赴援連戰俱捷冀得厚賞城上人羣詈爲賊投石擊死數人所遣邏卒指爲間諜而殺之勞而見罪是以奔還當出搗朶顏然後束身歸命柱國追及諸軍其將士持弓刀相向皆垂涕言督

師旣戮又將以大破擊斃我軍故至此柱國復前追大  
壽去已遠乃返承宗奏言大壽危疑已甚又不肯受滿  
桂節制因譎言激衆東奔非部下盡欲叛也當大開生  
路曲收衆心遂將多馬世龍舊部曲臣謹用便宜遣世  
龍馳諭其將士必解甲歸大壽不足慮也帝喜從之承  
宗密札諭大壽急上章自列且立功贖督師罪而已當  
代爲剖白大壽諾之具列東奔之故悉如將士言帝優  
詔報之命承宗移鎮關門諸將聞承宗世龍至多自拔  
來歸者大壽妻左氏亦以大義責其夫大壽歛兵待命  
當潰兵出關關城被劫掠閉門罷市承宗至人心始定

關城故十六里衛城止二里今敵在內關城無可守衛  
城連關可步屨而上也乃別築牆橫互於關城穴之使  
礮可平出城中水不足一晝夜穿鑿百井舊汴牙門將  
僑寓者千人窮而思亂皆廩之於官使巡行街衢守臺  
護倉均有所事內間不得發外來者輒爲邏騎所得由  
是關門守完乃遣世龍督步騎兵萬五千入援令遊擊  
祖可法等率騎兵四營西戍撫寧三年正月大壽入關  
謁承宗親軍五百人甲而候於門承宗開誠與語卽日  
列其所統步騎三萬於教場行誓師禮羣疑頓釋時我  
大清已拔遵化而守之是月四日拔永平八日拔遷安遂

下樂州分兵攻撫寧可法等堅守不下

大清兵遂向山海關離三十里而營副將官惟賢等力戰  
乃還攻撫寧及昌黎俱不下當是時京師道梗承宗大  
壽軍在東世龍及四方援軍在西承宗募死士沿海達  
京師始知關城尙無恙關西南三縣曰撫寧昌黎樂亭  
西北三城曰石門臺頭燕河六城東護關門西繞永平  
皆近關要地承宗飭諸城嚴守而遣將戍開平復建昌  
聲援始接方京師戒嚴天下勤王兵先後至者二十萬  
皆壁於薊門及近畿莫利先進詔旨屢督趣諸將亦時  
戰攻然莫能克復世龍請先復遵化承宗曰不然遵在



北易取而難守不如姑留之以分其勢而先圖灤今當多爲聲勢示欲圖遵之狀以牽之諸鎮赴豐潤開平聯關兵以圖灤得灤則以開平兵守之而騎兵決戰以圖永得灤永則關永合而取遵易易矣議既定乃令東西諸營並進親詣撫寧以督之五月十日大壽及張春邱禾嘉諸軍先抵灤城下世龍及尤世祿吳自勉楊麒王承恩繼至越二日克之而副將王維城等亦入遷安我大清兵守永平者盡撤而北還承宗遂入永平十六日諸將謝尙政等亦入遵化四城俱復帝爲告謝郊廟大行賞賚加承宗太傅賜蟒服白金世襲錦衣衛指揮僉事

力辭太傅不受而屢疏稱疾乞休優詔不允朶顏束不  
的反覆承宗令大將王威擊敗之復賚銀幣先以冊立  
東宮加太保及神宗實錄成加官亦如之並辭免而乞  
休不已帝命閣臣議去留不能決特遣中書齋手詔慰  
問乃起視事四年正月出關東巡抵松山錦州還入關  
復西巡徧閱三協十二路而返條上東西邊政八事帝  
咸採納五月以考滿詔加太傅兼食尙書俸廕尙寶司  
丞賚蟒服銀幣羊酒復辭太傅不受初右屯大凌河二  
城承宗已設兵戍守後高第來代盡撤之二城遂被毀  
至是禾嘉巡撫遼東議復取廣寧義州右屯三城承宗

言廣寧道遠當先據右屯築城大凌河以漸而進兵部  
尙書梁廷棟主之遂以七月興工工甫竣我

大清兵大至圍數周承宗聞馳赴錦州遣吳襄宋偉往救  
禾嘉屢易師期偉與襄又不相能遂大敗於長山至十  
月城中糧盡援絕守將祖大壽力屈出降城復被毀廷  
臣追咎築城非策也交章論禾嘉及承宗承宗復連疏  
引疾十一月得請賜銀幣乘傳歸言者追論其喪師辱  
國奪官閒住并奪寧遠世廕承宗復列上邊計十六事  
而極言禾嘉軍謀牴牾之失帝報聞而已家居七年中  
外屢請召用不報十一年我

大清兵深入內地以十一月九日攻高陽承宗率家人拒守

大兵將引去繞城納喊者三守者亦應之三曰此城笑也於法當破圍復合明日城陷被執望闕叩頭投繯而死年七十有六子舉人鈐尙寶丞鏞官生鈺生員鈴鏞從子鍊及孫之沆之滂之潁之浩之濂從孫之澈之漢之泳之澤之渙之瀚皆戰死督師中官高起潛以聞帝嗟悼命所司優卹當國者楊嗣昌薛國觀輩陰扼之但復故官予祭葬而已福王時始贈太師諡文忠

贊曰承宗以宰相再親師皆粗有成效矣奄豎斗筲後

先齎扼卒屏諸田野至閨門膏斧鑕而恤與不加國是  
如此求無危安可得也夫攻不足者守有餘度彼之才  
恢復固未易言令專任之猶足以慎固封守而延論紛  
呶亟行翦除蓋天眷有德氣運將更有莫之爲而爲者  
矣

按公後裔星若家藏胡統虞檢討所撰公墓表末  
云甲申春從僉事宋獻請諡文正而傳稱福王時  
始諡文忠是文正乃公原諡也謹據表文附識於  
此

明定興鹿忠節公傳

鹿善繼字伯順定興人祖久徵萬曆中進士授息縣知縣時詔天下度田各署上中下壤息獨以下田報曰度田以紓民乃病民乎調襄垣擢御史以言事謫澤州判官遷滎澤知縣未任而卒父正苦節自礪縣令某欲見之方糞田投錘而往急人之難傾其家不惜遠近稱鹿太公善繼端方謹愨由萬曆四十一年進士授戶部主事內艱除起故官遷左餉中絕廷臣數請發帑不報會廣東進金花銀善繼稽舊制金花貯庫備各邊應用乃奏記尙書李汝華曰與其請不發之帑何如留未進之

金汝華然之帝怒奪善繼俸一年越補進善繼持不可以死爭乃奪汝華俸二月降善繼一級調外汝華懼卒補銀進泰昌改元復原官典新餉連疏請帑百萬不報天啓元年遼陽陷以才改兵部職方主事大學士孫承宗理兵部事推心任之及閱視關門以善繼從出督師復表爲贊畫布衣羸馬出入亭障間延見將卒相勞苦拍地四百里收復城堡數十承宗倚之若左右手在關四年累進員外郎郎中承宗謝事善繼亦告歸先是楊左之獄起魏大中子學洙左光斗弟光明先後投鹿太公家太公客之與所善義士容城舉人孫奇逢謀持書

走關門告其難於承宗承宗善繼謀偕巡視薊門請入  
覲奄黨大譁謂閹部將提兵清君側嚴旨阻之獄益急  
五日一追贓拷掠甚酷太公急募得數百金輸之而兩  
人者則皆已斃矣至是善繼歸而周順昌之獄又起順  
昌善繼同年生善繼又爲募得數百金金入而順昌又  
斃奄黨居近善繼家難家子弟僕從相望於道太公曰  
吾不懼也崇禎元年逆璫旣誅善繼起尙寶卿遷太常  
少卿管光祿承事再請歸九年七月

大清兵攻定興善繼家在江村白太公請入扞城太公許  
之與里居知州薛一鶚等共守守六日而城破善繼死



家人奔告太公太公曰嗟乎吾兒素以身許國今果死  
吾復何憾事聞贈善繼大理卿諡忠節勅有司建祠子  
化麟舉天啓元年鄉試第一伏闕訟父忠踰年亦卒贊  
曰士大夫致政里居無封疆民社之責可遙迹自全非  
以必死爲勇也然而忼慨捐軀冒白刃而不悔湛宗覆  
族君子哀之豈非名義所在有重於生者乎氣節凜然  
要於自遂其志其英風義烈固不可泯沒於宇宙間矣

明贊畫茅元儀事略考

本督師紀畧摘錄

茅元儀字芷生歸安人爲諸生試於京師遼蜀事急言者薦其人並薦其所著武備志冒言等書十數上承宗時在講筵亦稱之或問曰豈以其書乎承宗曰以其人不以書卽以書而以其布置條畫如能將十萬也元儀不受薦引去承宗爲詩贈之有曰待爾翻飛日時清應有期

元儀在京師時每言遼經撫兩敗後如所言薦者益衆會白蓮寇起某以攝南樞奉命添兵自選大帥乃屬元儀爲京營副將順撫岳和聲遂薦以南樞所擬官赴薊

欲練永平車管上命撫按徵聘承宗時意在登萊檄調之率兵二萬守覺華仍馳書與儀令簡江南之舟來會元儀過關辭官不允乃以舟服謁承宗承宗屬以赴覺華

壬戌九月初八日孫承宗出關諸鎮道幕僚俱從過中前前屯中後中右凡小堡要台必躊躇商畧垂規畫於守者閱寧遠獨無言次日將出大將吏候於門衆議參差而袁崇煥鹿善繼茅元儀力主當守承宗出詢將吏卽曰我計決矣必復寧遠如以爲否必放老臣歸如留老臣舍寧遠無他圖也

時祖大壽以中朝必不守寧遠所築城潦草不中程承宗使元儀定關門建城式畫計相度量所須人盡調遼人之不中兵而應汰者及客兵之願爲築者加鹽菜期以冬末膠完理口春三月竣甃工

前毛文龍疏言關門當守紅螺是時元儀已改充贊畫因與滿桂至寧遠同大壽率家丁百餘東出登紅螺自敵地繞入歷觀塞外諸山不炊者七日又以築重關使依灰山則東敵入犯竟至塔山馬首西向稍循而北卽從諸口而入邊牆雖築處處須防不若依小紅螺之口而橫貫於塔山或守小紅螺之腰而橫貫於罩籬山則

敵必自大小紅螺之背從刺榆河轉而南向始可入鷹窩諸口其爲守較易若自喜峯而入固無所不通然山後之山尙厚祇可通零騎如大舉則其行於山外較山內甚遠可以必敵之不然然知承宗意決計東向不欲以進取駭中朝且勿令敵覺爲備以恐其聲中外也惟偕鹿善繼萬有孚滿桂孫諫趙率教以備關者促其備前屯而日練車炮蓋前屯旣備便可以備前屯者備寧遠前屯備而關門安寧遠備而前屯益安而寧遠以西官民共屯五千餘頃至是遼人出關者猝十餘萬被敵裹脅來歸者日夜不絕輪蹄輻輳儼如承平矣

承宗初歷寧遠時以柯仲炯議煮鹽關外使民無淡食  
且以生財與張撫議張撫曰人歲食鹽一觔二十萬能  
食幾何儀曰聞之會典人歲食鹽十二觔鳳儀以爲忤  
而鹽議竟行又聞有煤山親按之卽灰山以煉灰百俱  
皆興而敵亦不至

又立舟師之制四船爲舫二舫爲舶四舶爲艦三艦爲  
營每營沙船百隻爲率如其營船多則別設遊船有唬  
船有飛船一船領輕車一輛其兵在水爲船兵在陸爲  
車兵其官在船管水兵在車管陸兵其操演在海岸上  
下其軍火器械舟車兼用

高第再轉大司馬日請減兵因柳河之役遂張皇其事  
謂遼之精銳十萬已盡日夕見忠賢於工所逢其意乃  
自下檄馬世龍令撤錦右寧前之兵欲棄關外四百里  
儀力爭之謂敵三年不來非天幸實以兵勢旣張畏而  
不敢耳實柳河之失所損不過三百人第不得已祇撤  
錦右兵

以上俱載督師紀畧

天啓中徵爲翰林待詔從孫高陽幕渝水陟副帥逆璫  
時黨禍波之羈寓鹿伯順北海亭及杜氏城宅者四歲  
所著江村集十二卷文采風流猶可想見

載定興縣志

明武庫主事杜應芳事略考 本督師紀畧摘錄

忻州杜應芳初任順天府通判東事急上召孫承宗以原官督理關城承宗隨疏請順天府通判杜應芳改武庫主事隨行壬戌九月初三日抵關承制與孫元化按軍器火藥錢糧前沈際爲主在晉理其事際以勤省名而中有占匠數百日饜數十金或冒破工料或以解京者充爲已製造卽所製造者亦空有其名芳簡之其人不受也焚其局以賊芳承宗令監軍道捶殺其故焚者而以鹿善繼往乃始絀

別局在開平最大再令應芳往芳未及覈而夜半又焚



之芳倉遽出主局夏應禹泣曰循環簿燬矣奈何芳曰  
是不然循與環不俱在下也火必自應禹起更寔之法  
由是軍器火藥錢糧向之冒領虛報者爲之一清

世龍通於車者也然不言車惟日教以砲日督爲車皆  
芳親主之是時世龍鋒勁制已成將大舉而力未備適  
元儀募舟師至以羨自爲輕偏千輛輜車副之芳爲之  
制飛神炮百二十輛高麗牌萬竹將軍竹鳥鎗竹三眼  
銃各萬神臂弩神臂弓各千皆以合水軍使登陸卽成  
一軍而輕爲襲止爲陣巨細無所不備而舟師之制以

全

廩糧說廩糧以崇卑爲隆殺固也然官同而欽依與加銜同乎領兵與不領兵有信地與無信地同乎且有官崇而人或爲統官卑而或自爲制又或統轄之衆有合有分任使之員有繁有簡種種差殊所謂物之不齊物之情也廩之者倘不細爲區別但據其官同而概施之則身輕者不嫌過飽擔重者仍復苦飢事勢處其必窮而公家還受其敝此其於裕藏未嘗分毫省終無以收豪傑之用故天下事有平之而反以失平不平而乃得其平者廩糧之制是也廩不徒視其官實視其官之事事不同而廩因之條分縷析如春工肖物各與以當然

之分數而無私重輕我無私重輕人乃不得以意增減  
矣邊鎮原糧槩有定例而此地係草創當鼎沸絲勞之  
時銜出袖中糧憑領狀至是而官之眞面目與糧之眞  
分數始劃然揭於日月且斟酌等差其曲盡事體者遂  
有以深中夫人情赳赳武夫能一飽忘國恩哉是制也  
可以辨官可以清餉可以作忠蓋一舉而三善具云以  
上俱載督師紀畧

督師拾遺百八叩說跋

文正公拾遺一書向無鈔本世亦不多見大抵著於前後兩督師紀略之外者別標曰百八叩說則又拾遺中之一種也當文正初至關門經營四載先忠節公無日不在左右故前後兩督師略皆公爲之序是說也又與爲校訂想見當日戮力同心共圖大計人擬之裴晉公與韓昌黎同謀淮蔡洵不誣也嘗讀先忠節榆關草至答友人問邊事暨與兵垣書曰談信心不如談盡心又曰鈴閣意起鬼神莫測今讀是說而知當事之心之所以盡也既叩而復答矣尙有遺義之可拾乎然兵陰道

也陽用之則敗不有是說不足以神不測之用至其中  
或與前答互相發明或於答外別抒妙策大抵盡心二  
字括之矣已己夏尊既校叩答合編於省垣孫茂才炳  
文復以是卷見示云亦自新城孔氏抄來者因請於郭  
公景熙暨諸君子續刊於叩答之後輯爲一書劉公介  
卿謂與姬姜唐李之問答並美至是乃更詳且備歟然  
尊尤有祝者文正公遺書尙多孔氏之韞藏與茂才之  
蒐訪皆有心人也儻由此因端竟緒網羅散失相續於  
無窮不使督師巨製多有所遺而人人得而拾之則更  
天下大快也夫定興鹿學尊敬識

捐貲姓氏

江西 夏獻烈

郭會昌

河南 段福廣

劉福齡

山東 張恩旭

校正姓氏

河南 傅治安

陶澄瀚

直隸 孫炳文

鹿學尊